

ELKI 2013

Mit üsne Jüngste dörfe zturne bereitet mir o i mim zwöite Leiterjahr ä riese grossi Freud. Äs si soooo vieu schöni Idrück, dassi bim verfasse vo mim Jahresbricht gar nid rächt gwusst ha, was ig aues ufs Blatt söu chritzle. Dahär vö mr doch eifach chronologisch a....

Ab Januar 2013 heimer mit 25 Ching u ihrer Begleitperson zum Thema Tier turnet. Jedí Wuche heimer üs ines angers Tier verwandelt und d Bieudermappe mitem jewelige Tier chönne fülle. „MuVa u dr chlie Tarzan im Dschungu“ isch ds Thema i üsem Vaki-Turne im März gsi. Mitem Flüger simer i Dschungu greist u hei spannendi Abentür erläbt. Vor de Frühligsferie heimer üses Turnerjahr 2012 /2013 ire Doppustung abgeschlosse. Üsi grossi Gruppe het ire Ostergschicht erfahre, wie d Osternästli ir Osterhasfabrik gmacht wärde u wies zu jedem Ching hei glieferet wird.

I dr Elki-Pouse heimer mit 6 Päärli äs Tänzli für dEröffnungsfier vom ETF ungerem Motto „Seeländer Gmüesbure“ güebt. Dä speziue Alass isch aune no hüt sehr presänt – einerseits wägem Unwätter u angersiets wöu üsi chliene Chnöpf uf sore grosse Bühni hei dörfe turne!

Im Ougust simer mit 12 Ching u ihrer Begleitperson is neue Jahr 2013 / 2014 gstartet. Üses jetzige Thema isch d „Schwiz“ u daderzue het jedes Ching ä Reisepass bercho. Mir hei bereits unger anderem ä Stadtbsuech gmacht, ä Usflug i Waud, is Alpamare, ä Wanderig ir Natur oder hei oscho Fondue gmacht u zum Schluss berchunt jedes Ching äs chlieses Adänke für i Reisepass ine. Mitem VAKI-Turne im Septämber het sech üsi Turnhaue ines Indianerland verwandelt u daderzue het natürlech äs Tippi-Zäut nid dörfe fähle. Mit dene Indianer-Idrück isches de Ching vielech o bitzi eifacher gfaue, sech bim Soirée zum Thema „Rouchzeiche“ öpis chönne vorzsteue. D Kostüm sie ire Doppustung säuber bastlet worde. Üsi Indianer sie uf dr Bühni ums Ffür gsprunge, hei tanzet und hei mit rote Tüecher dRouchzeiche am Publikum Nöcher bracht.

Sit nach de Herbstferie heimer für di jüngere Gschwüsterti neu ä Chinderhort im Spieugruppehus. D Betreug vo de Ching wird unger de Mamis säuber abgsproche.

Mit „Winterplousch im Schnee“ heimer i üsere Wiehnachts-Doppustung ds Jahr la usklänge. Im Januar 2014 sí spar neuí Gsichter derzue cho u bis zum Abschluss Ändí März turne mir mit 24 Ching u ihrer Begleitperson. Morn wärde mir üses VAKI-Turne dürefüehre u bím gmüetleche Teil stosse dFamíliene ono derzue. I freue mí sehr, da míni zwöi Manne o z erste Mau düe mitturne!

Zum Schluss bleibt mir no öpis sehr sehr wichtigs übrig – MERCI zsäge! Merci dr Ungerstützig u Ergänzig vo míre Leiterpartnerin Corinne, wo während míre Bébépouse älleí gleitet het. Merci üsem Vereín o für dí finanzielli Ungerstützig und míre Familie wo mir díe Ziet gít, damit íg ds ELKI o wieterhin cha leíte.

I wünsche Aune vo Härze aues Liebe und Guete und hoffe, dass dir o wieterhin üse Vereín düet ungerstütze!

Liebí Grüess,

Bianca Burckhardt